



Atvinnuvega- og nýsköpunarráðuneytið
Skúlagötu 4
150 Reykjavík

Fjarðabyggð, 15.01.2020
Tilvísun 2001093/10.1

Umsögn um drög að reglugerð um Fiskeldissjóð, mál 314/2019

Vísað er til samráðsgáttar stjórnvalda, dags. 18. desember 2019, þar sem óskað er eftir umsögn um ofangreint mál.

Almennt um drögin

Við setningu laga um gjaldtöku af fiskeldi lagðist Fjarðabyggð gegn því að stofnaður yrði sérstakur sjóður sem hefði það hlutverk að ráðstafa tekjum ríkisins af fiskeldi. Afstaða Fjarðabyggðar er skýr að þau sveitarfélög sem hafa starfsemi þar sem nýting eldissvæða fer fram munu þurfa sérstakar tekjur til innviðauppbyggingar og því eðlilegra þau fengju beina hlutdeild í þeim tekjum sem verða til vegna fiskeldis. Ljóst er að mikil uppbygging innviða er óhjákvæmileg samhliða auknu eldi í fjörðum sveitarfélagsins. Sveitarfélagið Fjarðabyggð leggur því til að þau sveitarfélög sem hafa nýtingu á eldissvæðum fái hlutdeild af tekjum hins opinbera vegna hagnýtingu hinna sameiginlegu auðlinda. Er það í samræmi við það sem gert er annarstaðar.

Ekki síst vegna þess að samfara mikilli uppbyggingu í greininni þarf sveitarfélagið bregðast við með auknum fjárfestingum til hafnarmannvirkja. Því telur Fjarðabyggð að ekki eigi að nota sjóði sveitarfélaga til innviðauppbygginga og þá um leið til lögbundinna verkefna sem tengast fiskeldi.

Það er álit Fjarðabyggðar að fyrirkomulag það sem hefur verið staðfest í lögum um úthlutun fjármuna til sveitarfélaga í gegnum fiskeldissjóð sé tímaskekkja. Hvergi í lögum né í umræddri reglugerð er tryggt að gjaldið sem innheimt verður renni í pennan fiskeldissjóð því ráðstöfunarfé sjóðsins er fjárveiting hverju sinni af fjárlögum. Er því sá möguleiki uppi að lítið sem ekkert verðu úthlutað af ríkisvaldinu í sjóðinn og því um innantómt mál að ræða. Ef horft er á hvernig farið hefur verið með Ofanflóðasjóð sem þó er með tryggt tekjustreymi er ekki óvarlegt að álita að ofangreint geti átt sér stað. Þá er enginn fyrirsjánleiki varðandi úthlutanir sjóðsins og er það sett algerlega í vald þeirra þriggja aðila sem valdir eru í nefndina af ráðherra að ákveða að þeirra mati hver fái styrk. Þá eru engin skilyrði að þeir hafi neina þekkingu á þeim málaflokki sem um ræðir.

Um 3.gr. stjórn sjóðsins

Huga þarf vel að þekkingu á starfsemi fiskeldis og því er nauðsynlegt að byggðir sem búa yfir þekkingu á atvinnugreininni eigi fulltrúa í stjórn sjóðsins. Því gerir Fjarðabyggð athugasemd við 3.gr.og telur eðlilegt að tilnefndur sé fulltrúi í stjórn sjóðsins af Sambandi Íslenskra sveitarfélaga í stjórn hans.